

Ikalaata iya Paulo kwa

Fiilimooni

Uwandilo

UPaulo ásimbile ikalaata ili kwa Mukilisiti umo udumbwe, itaawa lyakwe áamile wu Fiilimooni. Umutumwa umo uwa Fiilimooni, itaawa lyakwe bhakhatinji uNeesimo, ábhelengushile. Kuwamalilishilo akhabha Mukilisiti, akhikhalaga nu Paulo we ali mwi jeela. Pe uPaulo ámugalusiize kwa Fiilimooni. Mwi kalaata ili akumulaabha uFiilimooni kumutuuyla uNeesimo, poope inga ku ndajizyo iya Shiluumi áyitishiliilwe kumugoga umutumwa we ábhelengushile. UPaulo akumubhuzya uFiilimooni amuposheelee uNeesimo umutumwa waakwe kubha wu nholo mwa Kilisiti.

Indamukho

¹ Ine ne Paulo, ne inkungiilwe kunongwa iya kulumbiilila intumi zya Yeesu Kilisiti. Peeku nu nholo wiitu mu lwitikho uTiimoti, itwe tukukusimbila Fiilimooni, wumubhombi uwamwitu umuganwa.

² Tukubhasimbila na bhantu abha shibhanza bhe bhakubhangaana mu nyumba yaakho, peeku nu yilumbu wiitu uAfiya, nu Alikipo, umusikaali uwamwitu mu mbombo ya Mulungu.

³ Utaata uMulungu nu Mwene uYeesu Kilisiti bhabhalolelaje uwiila, na kubhapa uwutengaanu.

UPaulo akumulaabhila uFiilimooni

⁴ Wiila bhulo we inkumulaabha uMulungu, inkukukumbukha niwe na kumusalifwa kunongwa yaakho. ⁵ Kunongwa ye inimvwizye izya shiila she

umwitishile uMwene uYeesu, na shiila she umuganile uYeesu peeka na bhafinjile bhonti.* ⁶ Inkumulaabha uMulungu kuti, uwupeeka wunuwu we ali nawo niitwe wukubhiishe kuti, uyavwaje abhanji, ufishile kumanya inyinza zyonti zye tukuziyaga kwi dala ilya kupatinhana nu Yeesu Kilisiti. ⁷ Nholo wiitu mu lwitikho, ku lugano lwakho lunuwu, wabhasansamusa amooyo abhafinjile, niine insesheeye nhaani, naagoma mu mwoyo waani.

uPaulo akumulaabhila ishisa uNeesimo

⁸ Kunongwa ye impatinhiine nu Kilisiti, inkwitishilwa kukulajizya ku wudandamazu lye ukhondeeye kubhomba anzu nholo awe umusundikwa. ⁹ She poope zili shiniisho, kulonga kwani kutibhe kwi dala ilya kukulamba mu lugano. Ine ne Paulo, ne ne mugoosi ne inkungiilwe mwi jeela kunongwa ya Yeesu Kilisiti. ¹⁰ Inkukulamba ku zya mwana waani uNeesimo.† Mu khabhalilo khe inkungiilwe ipa na manyooloo, inhamulumbiilila, akhabha mwana waani mu lwitikho. ¹¹ Mu nsiku zye akubhelengushile ataamile muntu we akhondeeye kukwakho, ileelo ishi abha muntu we akhondeeye kukwakho, niine kukwani akhondeeye.

¹² Pe shiniisho, inkumugalusa kukwakho, wunuwu imuganile ku mwoyo waani wonti. ¹³ Naayiganile asyale ipa niine, inga anavwaje gaala ge waamile unavwaje, mu khabhalilo khe inkungiilwe kunongwa yi Ntumi inyinza. ¹⁴ Ileelo litaliipo naalimo lye ingalibhomba sita weewe kunitishizya. Inga wanavwaga, kwavwa kwakho kubhe kwa shigane shaakho wuneewe, lyoli

* 1:5 1:5 Abhafinjile bhonti Bhaazya abhafinjile mu Wilulanyo uwa mazwi amajeni. † 1:10 1:10 UNeesimo kwe kuti uMuntu we akhondeeye.

kutakhabhe kwi dala ilya kubijilwa. ¹⁵ Lumo uNeesimo ásogooye kukwakho ukwo ku khabhalilo khashe, inga uMulumu amugalulanye agalushe kukwakho uyikhale peeka nawo mwa Yeesu Kilisiti wiila na wiila. ¹⁶ Te abhe mutumwa waakho bhulo khaala, lyoli atibhe nholo wiitu umuganwa mwa Yeesu Kilisiti. Ine imukundiye nhaani, iwe we utimukundile nhaani kushila anzu mwa uwa mu nyumba mumwakho, kabhili nholo mwa Mwene.

¹⁷ Pe shiniisho, inga ukuyilola kuti uli nu wupeeka niine, umuposheele akhinza anza she waamile umposheelaje ine naneene. ¹⁸ Inga kuli na zimo zye atulile kukwakho, awe ali ni deeni kukwakho, ine intikusombe. ¹⁹ Ine ne Paulo inkusimba ziniizi naneene ni nyoobhe yaani, kuti ine intisombe. Peeka na ziniizyo, yitakuti inkukumbusye, iwe umanyile kuti wu naanu we akulumbiliye, lyoli yikuti uyifumwe waneewe kukwani. ²⁰ Ishi nholo waani mu lwitikho, anaavwe mwa Mwene wiitu, kabhili unsansamusye umwoyo mwa Kilisiti. ²¹ Inkukusimbila ikalaata ili, kunongwa ye inkusubhila kuti utiniitische ku gaala ge nakulaabha. Imanyile kuti, utibhombwe kushila na ganaago.

²² Peeka na ziniizyo, inkukulaabha undinganizanye ulupitu pe inhayikhala. Kunongwa ye inkusubhila kuti, kufumilana ni mpuuto zyinyu, uMulumu atinsatule mwi jeela, inga ininze kukwinyu kubhayaatila.

Amazwi aga kulagana

²³ Unholo waani uEpaafula akukulamukha, uweene niine twenti tukungiilwe peeka mwi jeela, kunongwa iya kulumbilila iNtumi iNyinza izya Yeesu Kilisiti. ²⁴ Bhoope

abhabhombi abhamwitu abha panaapa, uMaalika, uAlisi-
taaliko, uDeema, nu Luuka bhakukulamukha. ²⁵ Uwiila
wa Mwene uYeesu Kilisiti wabhe peeka nimwe mwent.

ULufingo uLupwa ku ndongo iya Shimalila
Malila: ULufingo uLupwa ku ndongo iya Shimalila (New
Testament+)

copyright © 2020 Wycliffe Bible Translators, Inc.

Language: (Malila)

Contributor: SIL International (in Africa)

All rights reserved.

2020-11-18

PDF generated using Haiola and XeLaTeX on 14 Jun 2022 from source files dated 13 Jun 2022

3aa8e7a3-f258-5182-ab3f-fbc6f725bb06